

攝大乘論釋卷第八

天親

菩薩

枝九

陳天竺三藏法師真諦譯

釋應知入勝相品第六之餘

入資糧果章第七

釋曰由入應知勝相菩薩得何果菩薩得資糧果有八種

論曰由入此相得入初歡喜地

釋曰此文即顯三果一得勝時二得勝方便

三得勝果初即第一明得勝時果從始發心

修行求至此時今始得之故名爲初所求之時是入真觀時此明得住真如果又捨凡夫二乘位始得菩薩真位故名勝時此時是轉依時故名此初時爲勝時即是明轉依果歡喜即第二明得勝方便果捨自愛名歡生他愛名喜若不惜自身不憎惡他於衆行中無難行者此心於方便中最勝以爲衆行根本故故初地從此立名又未曾得大用及出世心得時有大欣慶故名歡喜地即明第三得勝果住攝是地義出離真如是地體住於此

體故名勝果地因名攝謂福德智慧二種資糧又所攝名攝謂所利益衆生又果名攝謂無上菩提又障名攝謂三煩惱如此等義說名爲地以是地所攝故

論曰善通達法界

皆善通達三約四種方便故善通達法界謂能通達生死苦而能恒入是二方便能通達涅槃而不速求是二方便能通達苦異凡夫入苦而不厭怖異二乘能通達涅槃樂異凡夫而不速求涅槃異二乘

論曰得生十方諸佛如來家

釋曰即明第四得勝通達果勝通達有三義一由得四依故菩薩依法不依人等由此通達如來所說一切三乘三藏菩薩如理釋文是故由文能令自他解真如法界二如來安立十地約法界有十重從初通達乃至上地

論曰即明第五得勝定位果由入此勝相是人決定應破無明齋不於卵中爛壞捨命復次是人由入此勝相決定應續十方諸佛種性今不斷絕以自應成佛又令他成佛故復

次佛子有五義一願樂無上乘爲種子二以

般若爲母三以定爲胎四以大悲爲乳母五  
以諸佛爲父由此等義故說得生佛家

論曰得一切衆生心平等

釋曰即明第六得勝恩養果恩養有四種一

廣大二最極三無邊四無倒由此四義故於  
衆生得平等恩養心復次如菩薩於自身起

般涅槃心於一切衆生平等起般涅槃心復

次由菩薩已得自他平等求滅他苦如求滅

自苦

論曰得一切菩薩心平等

釋曰即明第七得勝意用果菩薩若欲有所  
爲作必先思量故名爲意後如所思量而作  
故名爲用復次求得三事爲意謂未下種令  
下種未成熟令成熟未解脫令解脫行四攝  
爲用由前二攝三令發心由利行令成熟由同  
利令解脫

論曰得一切諸佛如來心平等

釋曰即明第八得勝至得果菩薩在見位中  
已得如來法身由得此法身是故與諸佛心

平等復次於自身見法界無差別故不見三  
世諸佛法界異自法界故得諸佛心平等  
論曰此觀名菩薩見道

釋曰菩薩見有三種一除方便見二應除見  
三除滅見除方便見者謂四種如實智應除  
見者謂分別依他二性除滅見者謂三無性  
此三見皆同唯識觀得成故名此觀爲見道  
相生明次第

二智用章第八

論曰復次何故菩薩入唯識觀

釋曰此問顯二義一顯唯識觀難入二顯若  
得入有無窮利益用

論曰由緣極通法爲境

釋曰先明入前後兩觀方便答第一問入唯  
識觀道此智有四德一無倒二清淨三寂靜  
四微細此即明第一無倒通法有四品謂下  
中上上上下品謂一切有流苦中品謂一切  
有爲無常上品謂一切法無我上上品謂三  
無性緣三無性爲境是故無倒

論曰出世

釋曰即第二清淨由是出世無流智故清淨

論曰奢摩他

釋曰即第三明寂靜由此智依奢摩他起離散動地是奢摩他智故名寂靜

論曰毗鉢舍那智故

釋曰即第四微細顯是菩薩修慧枝光非聞思慧及二乘修慧此即初入唯識觀方便

論曰由無分別智後所得

釋曰欲顯此智從無倒智生故無倒無倒故是如理智

論曰種種相識爲相智故

釋曰此顯如量智似一切境起以一切境識爲相於一切所知無礙由此智得入唯識後觀此即入後觀方便由前後方便難入故唯識觀難得

論曰爲除滅共本阿梨耶識中一切有因諸法種子

釋曰此下正明二智用此智用有三種一滅障二立因三得佛法用此文即明第一滅障用現在惑未滅令滅故言除未來惑未生遮

令不生故稱滅唯識道通滅不淨品種子因果因有三種一因緣二增上緣三緣緣果即是不淨品種子既通滅種子因果故稱共阿陀那識及六識爲不淨品因緣故名本阿梨耶識是不淨品增上緣緣緣即是六塵六塵

爲種子緣緣故一切法種子即是  
五一切不淨

品法種子種子即是果此果有緣緣等三因  
阿梨耶識既是種子增上緣故種子在阿梨耶識中

論曰爲生長能觸法身諸法種子

釋曰即明第二立因用諸法即是六度菩薩所行六波羅蜜熏習能爲無上菩提因故名種子此種子若生若長能證得如來法身故名爲觸爲生長如此福慧二因故入唯識觀故唯識觀能立因今得無上菩提

論曰爲轉依

釋曰此下明第三得佛法用爲得如來無垢清淨法身即漏盡無畏

論曰爲得一切如來正法

釋曰即是能說障道能說盡苦道二無畏爲

利益他爲安立正法

論曰爲得一切智智

釋曰即是  
一切智無畏此三句即顯三德初

明斷德次明恩德後明智德

論曰故入唯識觀

釋曰爲成就前三用故入唯識觀若由無分  
別智滅障立因得果故入唯識觀入觀後無  
分別後智其用云何若依無分別智正說諸  
法因果無有功能以此智無分別故由無分  
別後智於諸法相中菩薩自無顛倒如自所

證亦能爲他說諸法因果爲得此兩用故菩  
薩修無分別後智

論曰無分別智後所得智者於本識及所生  
一切識識及相識相中

釋曰此文顯菩薩由此智於因果中無倒本  
識是依他性即是正因所生一切識識即是  
本識所生果謂七識即是分別性相識即是  
器世界及六塵亦是本識果亦是分別性此  
文具明三相謂內相外相及內外相故言相  
中菩薩於如此因果中無復顛倒

論曰由觀似幻化等譬自性無顛倒

釋曰菩薩以無分別後智觀此因果相自然無顛倒不執有外塵內根唯識是實有法何以故菩薩已了別此等法似幻化等譬故不

可依見聞覽知相判諸法爲實有何以故此

心是清淨本所流故

論曰由此義故菩薩如幻師於一切幻事自了無倒

釋曰如幻師於幻事生見聞等四識不依此

識了別幻事如本所解了別幻事故於幻事

中無倒菩薩亦爾由依本智了別故於一切相及因果中無復顛倒是名菩薩自利

論曰於一切相因緣及果中若正說時常無偏倒

釋曰若菩薩依本智作利他事謂正說三乘

三藏及五明等義常無偏倒相違不實不定

名偏符理真實不可動爲無偏處時相濫名倒隨處隨時隨相名無倒是名菩薩利他

二智依止章第九

論曰是時正入唯識觀位中有四種三摩提

是四種通達分善根依止菩薩云何應見

釋曰此問欲顯入觀有三義一真境二奢摩他三毗鉢舍那爲明應入處故言正入唯識觀位中唯識處即三無性真如此真如非散動智境故說四種三摩提爲依止是境與智智不可分別故說四種通達分善根爲能證云何應見此法

論曰由四種尋思於下品無塵觀忍

釋曰樂觀無塵義故名爲忍此忍未離三相謂觀善成就因緣惑清淨未隨意修習故

是下品

論曰光得三摩提

釋曰無塵智名光此定以無塵智爲所得此定爲無塵智依止故名光得定即奢摩他智即毗鉢舍那若具五分五智此定名三摩提

論曰是暖行通達分善根依止

釋曰福德智慧二行爲暖行體即是三十七品此行是能燒惑薪道火前相故名暖此暖行已過地前四位決定了別真如智名通達此方便道能助成通達智故名分能資生究

竟位故名善根此定能爲通達分增上緣故  
名依止又三十七品中立定爲所依止餘三  
十六爲能依止就三十六中般若是通達餘  
三十五爲分三十六通名善根又四善根即  
是四分

論曰於最上品無塵觀忍光增三摩提是頂  
持九  
行通達分善根依止

釋曰已離三相故是最上品無塵觀忍如前  
釋無塵智名光此智於方便中勝進故名增  
此定爲無塵勝進智依止故名光增亦以福

德智慧二行爲頂行體頂有三義一如人頭  
頂能持身命修道者亦爾若至此位善根則  
不可斷二如山頂是退際有人至山頂而退  
還修道者亦爾或有至此位住方便中不進  
故名退三如山頂是進際或有人至山頂而  
更昇進修道者亦爾或有至此位而進入勝  
位故立頂名已說菩薩於四種尋思修暇頂  
二種方便道於四種如實智中修道云何  
論曰於四種如實智菩薩已入唯識觀了別  
無塵故

釋曰若菩薩過四種尋思度曖頂兩位則在  
四種如實智位中菩薩緣何境菩薩但緣唯  
識爲境緣唯識境復何所得了別無塵義除  
無明及疑惑故名了別此三句顯位及境智  
論曰正入真義一分

釋曰由此智故菩薩入真義一分謂無相性  
九

未入無生性及無性性

論曰通行三摩提是隨非安立諦忍依止

釋曰體無塵智名通此定以無塵智爲行即  
爲無塵智行依止故名通行三無性所顯人

法二空名非安立諦何以故此諦通一切法  
無有差別故名非安立無倒無變異故名諦  
忍能符從此義故名隨亦以福德智慧二行  
爲忍體菩薩已決了無外塵義於無能取所  
取義中心生信樂故名忍又能安受上品諦  
義故名忍於上品諦中心無退失故名忍  
論曰此三摩提最後剎那了伏唯識想

釋曰此三摩提即是通行三摩提取通行上  
上品最後一剎那定由先了別無相性後更  
思量所緣既無所有能緣必不得生由此了

別故能伏滅唯識想唯識想既滅從最後刹  
那更進第二刹那即入初地

論曰轉名無間三摩提

釋曰此定與初地相鄰不爲餘心所隔故名  
無間又下地惑不能礙其入初地不如下地

道隔勝方便不得即入初地故稱無間  
論曰應知是世第一法依止

釋曰菩薩以地前爲世法登地爲出世法此  
無間定猶是世法於世法中無等故名第一  
何以故世間衆生無有修行能等此法者又

此定雖是世法能爲菩薩出世道增上緣餘  
世法則無此義故名第一又唯一刹那故名  
前方便

論曰此四種三摩提是菩薩入非安立諦觀  
釋曰前二定是無間修後二定是恭敬修欲  
顯此四定非真道故故說是前方便

二智差別章第十

論曰若菩薩如此入初地已得見道得通達

釋曰此下顯見道爲修道依止由先成立見道故修道得成若菩薩於願樂地中具修諸方便得入初地所以得入初地由得見道故見道即無分別智所以得無分別智由通達真如及俗諦故知塵無所有是通達真如唯真如是通達俗復知此識無有生性是通達真如此識是假有爲通達俗若不通達俗無以能得見真以離俗無真故若不通達真無以遣俗以俗無別體故所以能通達真俗由能解唯識理故此文即顯四義一出世果二

出世行三出世境四出世方便初地是果總有爲無爲法爲體福德智慧行是有爲真如及煩惱不生是無爲初地是假名由是總故見道是行所通達真俗是境入唯識是方便由入唯識爲方便故能通達真俗境由通達真俗境故得無分別智行由得勝行故得初地果

論曰云何菩薩修習觀行入於修道

釋曰此云何凡問十義一相二次第三修四差別五攝相助六攝相礙七功德八更互觀

察九名十淨不淨數修所得爲修習福德智

慧爲行般若爲觀一切行悉是般若事皆屬

般若故名觀行又六度之中般若爲第一故

名觀行又見道名觀從見道後所得悉名爲

行菩薩依止見道以何相等得入初地

論曰如佛廣說所安立法相於菩薩十地

釋曰此中先明三慧境後明三慧功能此文

即明三慧境佛廣說是聞慧境所安立法相

即相等十種法相是思慧境於菩薩十地即

修慧境小乘亦有十地故以菩薩標之地地

皆有十相故言十地

論曰由攝一切如來所說大乘十二部經故得現前

釋曰此下明三慧功能此即明聞慧功能聞慧能通達十二部教故言攝

論曰由治所說通別二境

釋曰此明思慧功能通別二境即相等十法思慧能研習此十法故言法

論曰由生起緣極通境

釋曰此下明修慧功能方便爲生正觀爲起

無間道爲生解脫道爲起入分爲生出分爲  
起見道爲生修道爲起出世道爲生世間道  
爲起如理如量智所緣爲極通境  
論曰出世無分別智及無分別智後所得

釋曰此正明修慧體

十二

論曰奢摩他毗鉢舍那智

枝九

釋曰顯此二智寂靜無倒由奢摩他故寂靜  
由毗鉢舍那故無倒

論曰由無量無數百千俱胝大劫中依數數  
修習

釋曰此文顯三慧具四種修不可以譬類得  
知爲無量不可數知爲無數百億爲一俱胝  
非一俱胝故言千亦非一千故言百非小劫  
故言大此即明長時修數數修習即顯無間  
恭敬無餘三修

論曰由昔及今所得轉依

釋曰先於入見位時所得轉依此法是修道  
攝持故一切所修皆成聖道已過願樂地故  
論曰爲得三種佛身更修加行  
釋曰是修道攝持究竟用由如此道理菩薩

更修加行先修道爲見真如今重修道爲得三身故言更修復次

論曰云何

釋曰云何是問詞凡約六義爲問一約修位境界爲問修道境界自有三種一加行依止謂文教二修行資糧謂依理判義三修行所通達處謂修慧境界後三句明三慧境界以答此問二約修位三慧功能爲問後三句明三慧功能以答此問初明聞慧是修慧方便次明思慧是修慧資糧後明無分別智是修

慧體三約修位修慧因果爲問後明無分別智後所得以答此問由修慧此智得生故是修慧果若無此智不得進後道故是修慧因四約修位四修爲問後明長時修乃至無餘修以答此問五約修位依止爲問後明轉依以答此問若無此轉依爲依止修位不成聖道何以故凡夫依未轉故六約修位勝用爲問後明三身以答此問爲圓滿自利利他兩用故修加行復次論曰云何

釋曰通問修位次第後具明次第從初起修心乃至修位究竟以答此問先以三句明闡思修位即三慧境次三句顯能入三境功能即是三慧次顯利他功能即無分別智後所得如自所證爲他解說次明四修顯修位由四修得成滿次明轉依顯自利轉依是得法身四德之本故是自利次明三身三身於究竟修位得成能平等利益自他法身是自利應化二身是利他復次論曰如佛廣說所安立法相於菩薩十地

釋曰十地即華嚴經中十地品所顯文句此文句中如來廣說隨所安立道理復次論曰由攝一切如來所說大乘十二部經故得現前

釋曰合如來所說一切法通爲一境復次

論曰由治所說通別二境

共

十四

釋曰所合之境爲單爲複欲顯雙觀真俗通一無相復次

論曰由生起緣極通境出世無分別智及無分別智後所得奢摩他毗鉢舍那智

釋曰顯道二體更互相攝由奢摩他故智不散由毗鉢舍那故定無啾味等染污復次論曰無分別智後所得奢摩他毗鉢舍那智

由無量無數百千俱胝大劫中依數數修習由昔所得轉依爲得三種佛身更修加行

釋曰此智爲是世智爲出世智不可說是世智以非世間所習故不可說是出世智以於世間心中起故此心異無分別智心此心亦可說世出世及非世非出世此二智於長時數習故得轉依由轉依故菩薩作心云我

今必定應得三種佛身爲此義故更修加行論曰是聲聞見道是菩薩見道此二見道差別云何

釋曰聲聞見道是他道菩薩見道是自道此二見道道差別及果差別其相云何

論曰聲聞菩薩見道應知有十一種差別十五釋曰前五明道差別後六明果差別前五明道差別者

論曰何者爲一一由境界差別謂緣大乘法爲境

釋曰如來所說大乘十二部經說修行法緣此法爲境故發道心小乘道則無此事論曰二由依止差別謂依大福德智慧資糧爲依止

釋曰此道與二乘及世間道有異世間但修福德而無智慧二乘但修智慧而無福德菩薩具修福德智慧故明道得成助道即是依止此依止在道方便中即思修二慧論曰三由通達差別謂通達入法二無我釋曰先於方便中已得思修慧從此得入真

觀能通達人法二無我理故於人法不生愛著凡夫著人二乘著法菩薩並不著故言離欲人法此即明菩薩所得真修慧是正道體異於小乘

論曰四由涅槃差別謂攝無住處涅槃以爲住處

釋曰此涅槃非是道果是道住處何以故由菩薩行般若觀察生死過失故修道不在生死由菩薩行大悲觀衆生苦起救濟心雖不在生死而不捨生死故不住涅槃由道住此

處不執眞俗二相生故名無相道小乘道則無此事

論曰五由地差別謂依十地爲出離

釋曰道有下中上上即是十地此十地出離

四種生死爲通功能依此十地菩薩道能出

離異於小乘後六明果差別者

論曰六七由清淨差別謂滅煩惱習氣及治淨土爲清淨

釋曰前有五事已明道差別此下六事次明修道所得果與二乘有異第六明內清淨第

七明外清淨內由自相續中修道滅除煩惱習氣故名內清淨外由修淨土行所居之土無有五濁如玻璃珂等世界故名外清淨內爲自清淨外爲清淨他小乘則無此事

論曰八由於一切衆生得平等心差別謂爲

成熟衆生不捨加行功德善根

釋曰菩薩如自身應般涅槃欲般涅槃一切衆生由此平等心故不捨加行功德善根餘

度爲功德般若爲善根又五度爲功德精進爲善根又般若精進爲善根餘度爲功德小

乘則無此事

論曰九由受生差別謂生如來家爲生故  
釋曰見真如理證佛法身能使如來種性不  
絕故稱生如來家由生如來家乃至當來得  
成佛故言爲生故小乘則無此事

論曰十由顯現<sup>枝九</sup>差別謂於佛子大集輪中常  
能顯現爲攝受正法

釋曰諸菩薩通稱佛子衆多菩薩聚會故言  
大集如來所說法有三義故名輪一能上下  
二未得能得已得能守三能從此到彼菩薩

常於大集中顯現示不破僧常於法輪中顯  
現示能護持正法已得令不失爲攝未得令  
得爲受小乘則無此事

論曰十一由果差別謂十力無畏不共如來  
法及無量功德生爲果故

釋曰菩薩修道皆爲得如來如此等果小乘  
則無此事

論曰此中說兩偈

釋曰此中即見道中說兩偈顯從見道方便  
入真如觀

論曰  
名義互爲客 菩薩應尋思 應觀二唯量  
及彼二假說 從此生實智 離塵分別三  
若見其非有 得入二無性

論曰名義互爲客 菩薩應尋思

釋曰名於義中是客義於名中亦是客以非  
本性類故菩薩入寂靜位應觀此道理此即  
第一尋思方便

論曰應觀二唯量 及彼二假說

釋曰菩薩應觀名義二法唯無所有爲量何

以故義有二種一自性二差別悉無所有但  
是假說此假說若與義同義無所有假說亦  
無所有若與義不同則自然無所有假說即  
是名名無所有故於義是客義無所有故於  
名是客無所有是名義本性故以本性爲唯  
量若分別作名義此分別本性無相故以無  
第十九相爲名義唯量此即第二如實智方便

論曰從此生實智 離塵分別三

釋曰從四種尋思生四種如實智何人能得  
此四智若人能見三種但是分別實無外塵

此人則得一分如實智何者是三分別一分

別名二分別自性三分別差別

論曰若見其非有

釋曰前二句明了達三分別得入無塵觀依  
依他性以遣分別性此句明依真如遣依他  
性云何能遣由名義無所有能分別亦不得  
是有何以故若所分別名義是有能分別緣  
緣既是無能分別體亦無所有若菩薩見義  
無所有故能分別亦無所有此菩薩得入何

觀

論曰得入三無性

釋曰菩薩見名義更互爲客入異名義分別  
性若菩薩見名自性假說差別假說唯分別  
爲體得入分別無相性若菩薩但見亂識無  
六種相此亂識體不成故不可說因緣不成  
故不可執有生起此中分別既無言說亦不  
可得則入依他無生性若菩薩見此二義有  
十九無無所有則入三無性非安立諦  
論曰又正教兩偈如分別觀論說

釋曰今此論中顯入見道境智不圓滿故引分別觀論兩偈顯成此義何人何位能見此心但是影無實法義論曰

菩薩在靜位 觀心唯是影 捨離外塵相  
唯定觀自想 菩薩住於內 入所取非有  
次觀能取空 後觸二無得

論曰菩薩在靜位 觀心唯是影

釋曰唯菩薩人在寂靜位能作此觀法義實無所有心似法義顯現故說唯是影

論曰捨離外塵相 唯定觀自想

釋曰若人在寂靜位中已了別心唯是影能除外塵相是自心似法及義相起作如此觀

論曰菩薩住於內

釋曰若菩薩心如此得住實無有塵心緣內心起不緣外塵故住於內若住於內此心定何所觀

論曰入所取非有

釋曰是所取義實無所有菩薩能見所取境空

論曰次觀能取空

釋曰由所取義既實非有世間所說心是能取如此道理亦不得成是故觀行人亦不見有能取心前已不見所取後又不見能取是時觀行人有何所得

論曰後觸二無得

釋曰真如非所取非能取以無所得爲體故說真如爲二無得是人先已入無相性次入無生性後入真如無性性觸以入得爲義由入得真如故名爲觸前兩偈與後兩偈異相

云何前兩偈約名義及假說顯四尋思及四如實智爲方便得入真觀後兩偈明三性體及三無性又前兩偈顯正教明入三性及三無性後兩偈顯所入三性及三無性

論曰復有大乘莊嚴經論所說五偈爲顯此

道

釋曰經義深隱難解如實顯了經中正義故名莊嚴經論論解此經故得莊嚴名莊嚴經論中有衆多義今但略取五偈此偈欲何所顯此偈爲顯於修道中難覺了義

論曰

菩薩生長福及慧  
於法思惟心決故  
能了義類分別因

論曰菩薩生長福及慧

釋曰菩薩如前釋生在見位長在修位又初  
枝九  
刹那名生後刹那名長又單名生複名長菩  
升一  
薩所修唯複無單故生長一時而成所生長  
何法謂福及慧施等三度名福般若名慧精  
進及定若爲生福則屬福若爲生慧則屬慧  
所以爾者精進若爲生布施持戒忍辱則屬

福若爲生聞思修慧則屬慧定若依四無量  
起緣衆生爲境則屬福若爲生盡智無生智  
及無分別智等則屬慧誰能生長謂菩薩人  
論曰二種資糧無量際

釋曰此福及慧有二種功用一能助道二能  
成道體由此二故道得成就故說此二爲道  
資糧此二用幾功力凡經幾時得成就道功  
力無量時節無際無言顯長遠譬如說大海  
無量大劫無際以長遠故資糧亦爾修一  
度皆遍一切衆生故功力無量修一一度經

三阿僧祇劫故經時無際

論曰於法思惟心決故

釋曰由定後心觀察諸法是故於法心得決定又菩薩備修五明於度量方便具足自能故於思惟心得決定

論曰能了義類分別因

釋曰菩薩能比能證故名能了真俗二諦名爲義類知此義類但以分別爲因是故能了

論曰

已知義類但分別 得住似義唯識中

故觀行人證法界 能離二相及無二

論曰已知義類但分別

釋曰由菩薩已於義類及分別心決定故

論曰得住似義唯識中

釋曰由菩薩如此思惟但識似塵顯現故菩

薩心住唯識中不緣外起

論曰故觀行人證法界

釋曰由觀行人離外塵但緣識住知塵無相

名證法界

論曰能離二相及無二

釋曰所證法界有何相離能取所取二相及無人法二分別如此法界菩薩已證

論曰

若離於心知無餘 由此即見心非有智人見此二不有 得住無二真法界

論曰若離於心知無餘  
釋曰由此方便令法界可證今顯此方便知

離唯識外無別有餘法

論曰由此即見心非有

釋曰由見所緣義非有知能緣心亦非有

論曰智人見此二不有

釋曰智人謂諸菩薩見境及心二皆非有

論曰得住無二真法界

釋曰菩薩若見二皆非有則得住真法界真法界者無塵無識故言無二離顛倒及變異

二虛妄故名真第十三是諸法第一性故名法界

論曰

由無分別智慧人 恒平等行遍一切

染依稠密過聚性 遣滅如藥能除毒

論曰由無分別智慧人 恒平等行遍一切

釋曰此已見真如菩薩說名慧人已於見道中得無分別智此智何相一以無退爲相不退故稱恒二以平等行爲相此智見一切法平等理猶如虛空於如來所說十二部修多羅三乘等法同見一味無有差別内外法名

一切內外諸法同一如性故名爲遍平等行顯智慧體遍一切顯智慧境界由如此無分別智菩薩欲何所作

論曰染依稠密過聚性

釋曰三種不淨品名染此染以過聚性爲依

止從過聚性生故此過聚性名稠密以難解難破故離如來正教餘教不能令解故言難解離無分別智餘智不能破故言難破一切染污法熏習種子是過聚性體  
論曰遣滅如藥能除毒

釋曰此性是三品不淨法因難解難破惑等熏習種子爲性由無分別智聰慧人能遣能滅此過聚性如阿伽陀藥能除諸毒遣約現在滅約未來即是菩薩盡無生智

論曰

佛說正法善成立 安心有根於法界  
已知憶念唯分別 功德海岸智人至  
論曰佛說正法善成立

釋曰一切三世諸佛共說此法所說理同不  
相違背故名正法又欲顯說者勝故言佛說  
枝九  
由所說道理勝及所得果勝故名正法如來  
成立正法有三種一立小乘二立大乘三立  
一乘於此三中第三最勝故名善成立

論曰安心有根於法界

釋曰菩薩先已得聞思二慧安心於如來正

法中後合觀如來一切正說爲境界即是無  
分別智此智名有根得此智已餘智皆滅唯  
此智不可動壞故名有根復次於三無流根  
中此智爲第一謂未知欲知根故名有根復  
次解脫有三事一能生解脫二能持解脫令  
住不失三能用解脫自利利他此解脫三事  
即配三無流根此無分別智通於三處得名  
自體是根又能爲他作根故名有根此有根  
心安住法界中

論曰已知憶念唯分別

釋曰菩薩已住有根心中後出觀時在無分別後智心中如前入觀事皆能憶念知此憶念非實有唯是分別由無分別智及無分別後智菩薩得進何位

論曰功德海岸智人至

釋曰如來功德因中有十地十波羅蜜等果  
枝光  
中有智德斷德恩德如此諸德唯佛一人餘人所不能得故名爲海因果究竟名之爲岸  
智人即是菩薩菩薩乘前二智能至未曾至功德海岸此中五偈總明衆義第一偈顯道

資糧第二偈顯道加行第三偈顯見道第四偈顯修道第五偈顯究竟道

攝大乘論釋卷第八

音釋

曖乃管切稠直由切溫也密也

永樂北藏

攝大乘論釋

第九八册